

RI WUJ XTZ'IB'AX CHKECH RI E'AJFILIPO

Keb' oxib' tzij puwi' ri Eajfilipo

We wuj xtaq chkech ri e'ajfilipo, are kuk'utu che we winaq ri' kakiloq'oq'ej ri Pab'lo. Pa we wuj ri', xoque' k'o jun utzalaj b'ix puwi' ri ukamikal e ri uk'astajib'al ri Kristo pa ri 2,6-11:

⁶*Ri are', che are uwachb'al ri Dyos
man xukoj taj ri taqal chrij che kab'an chrech jeri' jacha Dyos,
ri ub'antajik che junam ruk' ri ub'antajik ri Dyos.*

⁷*K'atek'ut, ri Are' xub'an rib' che xas man k'o ta wi ub'antajik
xruxisaj rib' che ximitalik, xruxisaj rib' jacha' jun winaq,
xch'ob'taj uwach pa ri uka'yb'al jeri' jacha jun winaq,*

⁸*xunitz'arisaj chi na rib', xnimanik chi k'a pa ri kamikal
e jun kamikal cho ri ripib'al.*

⁹*rumal k'u weri', ri Dyos xunimarisaj ub'antajik ri are'
e xuya chrech ri jun B'i'aj che k'o puwi' ronojel b'i'aj*

¹⁰*arech, ronojel jas uwach, rumal ri ub'i' ri Jesus,
kexuki'k konojel taq ch'e'k, ri ek'o pa ri nimalaj kaj
ri ek'o pa ri uwachulew, ri ek'o chuxe' ri uwachulew*

¹¹*e ronojel aq'aj kuya ub'ixik che ri Jesus Kristo are Ajawxel
rech uq'ijilaxik ri Dyos Tataxel."*

RI WUJ XTZ'IB'AX CHKECH RI E'AJFILIPO

Ri jetaq sipanik e ri nimalaj rutzil wach chiwech

¹Ri Pab'lo e ri Timote'o, e'upataninel ri Kristo Jesus, chkech konojel ri etyoxlaj taq winaq pa ri Kristo, ri e'are' che e'ajfilipo kuk' ri ekajyuq'ab' e kuk' ri ekidi'akonos. ²Ri sipanik e ri nimalaj utzil chiwech ri ix, rumal ri Dyos Qatat e ri Ajawxel Jesus Kristo.

Kinmaltyoxij chech ri Nudyos

³Kinmaltyoxij chrech ri Nudyos ronojel taq mul aretaq chi' ri in kinchoman piwi' ri ix; ⁴ronojel taq q'ij, pa ronojel mul aretaq chi' kinch'aw ruk' ri Dyos kinta' piwi' iwonojel ri ix ruk' ki'kotemal; ⁵rumal rech che kinna'tisaj, che ri ix, utz ub'anik ri chak kib'ano pa ri utzalaj tzij xas pa ri nab'e q'ij chi k'ate' kamik ri'. ⁶K'atek'uri', qas are ri are' ri', che xuchapalej iwuk' ri ix we utzalaj chak ri', kuterne'b'ej na k'uri' ri uchak chi k'ate' na pa ri Uq'ij ri Jesus Kristo. ⁷Utz che ri in jewa' we nuchomanik chiwij ri', rumal rech che ri ix ixk'o pa ri wanima', ri ix ixk'o pa ri ch'ich' inujat'im pache', xoquje' ixk'o pa ri uto'ik e pa ri uya'ik uchuq'ab' ri utzalaj tzij, ri ix ixk'o wuk' pa ri nusipanik. ⁸Je' nak'ut, ri Dyos xinrilo, jche ri in sib'alaj kixinloq'oj iwonojel pa ri ranima' ri Kristo Jesus! ⁹K'atek'uri', are wa' weri' kinta pa ri nuch'awem: ri loq'oq'eb'al ik'u'x, qas chnimar b'a'; qas chk'o'ji' b'a' utzalaj ino'jib'al e qas utz rilik unik'oxik ronojel, ¹⁰ri kya' na ri' chiwech arech qas kinik'oj na ri utzil e ri suk'il, e ri nim ub'antajik, arech kixopanik qas ch'ajch'oj ri ik'aslemal e man k'o ta kixq'iliwik pa ri uq'ij ri Kristo, ¹¹qas ix k'o ta b'a' pa ri utzalaj chak rech ri suk'il che k'o quk' rumal ri Jesus Kristo, rech uq'ijilaxik e umaltyoxixik ri Dyos.

Ri jastaq xink'ulmaj ri in, utz xuk'ama' uloq chrech ri Utzalaj Tziz

¹²E'achalaxik, ri in kinwaj che ri ix kiweta'maj ri jastaq che ri xink'ulmaj ri in, utz xuk'ama' uloq chrech ri Utzalaj Tziz, ¹³rumal rech che pa ri Pretori'o e pa ronojel k'olib'al, sib'alaj eta'matalik che inyutulik e ink'o pa che' rumal ri Kristo, ¹⁴e sib'alaj e'achalaxik k'o ri kichuq'ab' pa ri Ajawxel rumal che inyutalik ri'; e ri e'are' k'o sib'alaj kichuq'ab' e man kkixib'ij ta kib' che ub'ixik we tziz ri'. ¹⁵Je' nak'ut, ek'o nik'aj kkiya ub'ixik ri Kristo ruk' ri kyaqre'nik, ruk' itzel taq uxlab'al rech ch'o'jinik; k'atek'ut ek'o enik'aj chik, che ruk' utzalaj chomanik kkiya ub'ixik ri Kristo. ¹⁶Ri e'are', kkib'an weri' rumal ri uloq'oq'eb'al kik'u'x; rumal rech che keta'm, che ri in rajawaxik kinto' uwach ri utzalaj tziz ruk' weri'; ¹⁷ri enab'e, ruk' jun itzel uxlab'al rech ch'o'jinik, kkiya ub'ixik ri Kristo; man suk' ta ri kichomanik; kkichomaj che ruk' weri' kkiya chi na ra'lal ri jetaq ch'ich' che inujat'im. ¹⁸K'atek'ut, jzas k'ut? Pune'tane' kumal ri keb' kiwach on kumal ri qastzij ek'olik, xas k'o jun tziz puwi' ri Kristo e ri in kinki'kotik rumal weri' e xas kuya na ri' nuki'kotemal, ¹⁹rumal rech che ri in, qas weta'm che wa' weri' kuya na ri nukolotajem ruk' ri ich'ab'al e ruk' ri uchuq'ab' ri Ruxlab'al ri Jesus Kristo che kyataj na chwech, ²⁰weri', che sib'alaj kinwe'yej ri in: man kink'ix ta ri' chuwach jun jas uwach, xane kink'ol na wa' ronojel ri ukowil nuk'u'x; e we jumul ri' jena k'uwa' jacha ronojel taq jumul chik, ri Kristo kq'ijilaxik

wa' pa ri nub'aqil ri in, kne'b'a' we kink'asi'k on we kinkamik. ²¹Rumal rech, che chnuwach ri in, are ri Kristo ri k'aslemal e ri kamikal xa jun ch'akoj. ²²K'atek'ut, we ruk' ri nuk'aslemal pa we nub'aqil ri', ri in kinkowinik kinb'an jun nimalaj utzil, ri in man weta'm taj jachinchikech kincha'o. ²³K'atek'ut, ruk' we jun k'amal ri': ri in are nab'e kinwaj kinb'e ruk' ri Kristo e qastzij nak'ut che wa' weri' are sib'alaj utz; ²⁴e pa ri uk'ab', we ri in kinkanaj kan pa ri nub'aqil are sib'alaj utz wa' chiwech ri ix. ²⁵Xa jek'uri', ruk' weri', utz chnuwach ri in we kinkanaj kan iwuk' iwonojel arech kk'iyik ri ikojonik e ri eki'kotemal ²⁶arech, aretaq chi' kintzalej chi uloq jumul, ri nuk'olem iwuk' kuya jun ki'kotemal chiwech e kuya jun nimalaj iq'ij pa ri Kristo Jesus.

Ri k'axk'ol pa ri utoq'ob' ri Kristo

²⁷Chk'o'ji' b'a' jun utzalaj ik'aslemal chuwach ri Utzalaj Utzij ri Kristo arech ri in, we kinb'e na che iwilik pa ri itinimit on we man kinb'e taj, ri in kinta' na utzijol che ri ix ix k'o pa ri uchuq'ab' xa jun chi uxlab'al, che ri ix ruk' xa jun iwanima' kiko'j ichuq'ab' arech kk'iy ri kojonik chech ri Utzalaj Tzij; ²⁸ri ix mixib'ij b'a' iwib' chkiwach ri ik'ulel: we man kixib'ij iwib', jun utzalaj k'utb'al ri' rech k'ax chkech ri e'are' e chiwech ri ix uk'utb'al ikolotajem ri'. E wa' weri' petinaq uloq tza xas ri Dyos: ²⁹rumal ri utoq'ob', xya'taj chiwech ri ix man xuwi ta ri ikojb'al chech ri Kristo, xane xoquje' xya'taj chiwech kiriq na ri k'ax pa ri utoq'ob' ri are'. ³⁰Rumal k'uwa' weri', ri ix chikojo b'a' ichuq'ab', jeri' jacha xiwil chwech ri in e kamik ri' ri ix iweta'm che tajin na kinkoj na nuchuq'ab' ri in.

Xa jun b'a' chib'ana' pa ri moch'och'em ib'

²¹Xa jek'uri', ri in sib'alaj kink'omij chiwech puwi' ronojel ri rajawaxik taq sik'inik kub'an ri Kristo, kink'omij chiwech ruk' sib'alaj loq'oq'eb'al k'u'x, ruk' ri riqoj ib' pa ri Uxlab'xel, ruk' nimalaj toq'ob'isab'al k'u'x, ²chinoisaj b'a' ri nuk'aslemal ruk' xa jun chi ichomanik, xa jun chi loq'oq'eb'al ik'u'x, xa jun chi uxlab'al, xa jun chi ichomab'al; ³mak'o jun jas uwach mib'ano rumal k'ulel iwib' e rumal nimal, chijujunal chichomaj che konojel winaq nimalaj kib'antajik chiwach ri ix; ⁴man xuwi taj kitzukuj ri utzil chiwech ri ix, xoquje' chitzukuj ri utzil chkech ri enik'aj chik. ⁵Chk'o'ji' b'a' iwuk' ri uchomab'al ri Kristo Jesus:

⁶Ri are', che are uwachb'al ri Dyos

man xukoj taj ri taqal chrij che kb'an chech jeri' jacha Dyos,
ri ub'antajik che junam ruk' ri ub'antajik ri Dyos.

⁷K'atek'ut, ri Are' xub'an rib' che xas ma k'o ta wi ub'antajik
xruxisaj rib' che ximitalik xruxisaj rib' jacha' jun winaq,

xch'ob'taj uwach pa ri uka'yb'al jeri' jacha jun winaq,

⁸xunitz'arisaj chi na rib' xnimanik chi k'a pa ri kamikal
e jun kamikal cho ri ripib'al.

⁹Rumal k'u weri', ri Dyos xunimarisaj ub'antajik ri are'
e xuya chech ri jun B'i'aj che k'o puwi' ronojel b'i'aj

¹⁰arech, ronojel jas uwach, rumal ri ub'i' ri Jesus,

kexuki'k konojel taq ch'ek, ri ek'o pa ri nimalaj kaj

ri ek'o pa ri uwachulew, ri ek'o chuxe' ri uwachulew

¹¹e ronojel aq'aj kuya ub'ixik che ri Jesus Kristo are Ajawxel
rech uq'ijilaxik ri Dyos Tataxel.

Chib'ana' ri uchak ri Dyos

¹²Xa jek'uri', ix nuloq' jeri' nak'ut jacha ix nimaninaq pa ronojel mul, rajawaxik che ma xuwi taj aretaq chi' ri in ink'o iwuk', xane sib'alaj rajawaxik chi na chanim ri' che ri in ma ink'o ta iwuk', chixchakun b'a' ruk' xib'im ib' e ruk' b'irb'itkil rech ri ikolotajem: ¹³Xa jek'uri', ri Dyos k'o waral ri', are are' kuchakuj iwuk' ix ri ajawaxik e ri chakunem, che nimalaj utzil chrech ri utz taq uchomab'al are'. ¹⁴Chib'ana' ronojel man ruk' ta wixwitem e man ruk' ta k'ule'la'n tzij, ¹⁵e arech man k'o ta jun jas uwach mak kch'a' chiwech e arech sib'alaj ixch'ojch'oj, ix ralk'uwa'l ri Dyos chkixo'l jun itzelalaj e k'axalaj ija'lil, che ri ix ma k'o ta jun itz'ilal, chixchuplinoq b'a' ix je' jas jun yab'al saqil pa we uwachulew ri', ¹⁶ruk' ri uk'utik ri Tzij rech ri k'aslemal. Ruk' weri', ri ix kisuk'umaj nimalaj wech ri in pa ri uq'ij ri Kristo, rumal rech che ri nub'inem e ri xink'axk'olij man xaq ta ksach uwach ri'. ¹⁷We rajawaxik che xoquje' kinq'ejeje na ri nukik'el rumal utoq'ob'isaxik uwach ri ikojonik ri ix, ri in sib'alaj kinki'kotik e kinki'kotik iwuk' iwonojel, ¹⁸xoquje' b'a' ri ix chixki'kot b'a' e chixja'jatoq wuk' ri in.

Ri kichak ri Timote'o e ri Epafrodito

¹⁹Ri in kinweye'j pa ri Ajawxel Jesus, che kintaq na ub'i' chiwech chi pa aninaqil, ri Timote'o, arech ri in kkub'i' nuk'u'x aretaq chi' kinta' itzijol ri ix. ²⁰Rumal rech, che ma k'o ta jun winaq wuk' ri in che jeri' jas ri are', che kkowinik ruk' jun utzalaj ranima' kixril wi ri ix, ²¹konojel nak'ut are kkitzukurij ri utz kech wi ri e'are' e man are ta kkitzukurij ri utzil rech ri Jesus Kristo. ²²K'atek'uri', ri ix iweta'm che utz ri uchak ri are': ri are' je' jas jun k'ojolxel che k'o putzal ri utat, xupatanij wuk' ri in ri utzalaj tzij. ²³Xa jek'uri', ri in kinwaj, che are are' kintaq na ub'ik iwuk', aretaq chi' ri in q'alaj chik chnuwach ri kinriqitaj wi kamik. ²⁴Xoquje', ri in qas utz reye'xik kinb'an pa ri Ajawxel che ri in chi ma naj ta chi wa' ri in kinopan na wa' iwuk'.

²⁵K'atek'uri', ri in kinchomaj che kintaq na ub'ik iwuk' ri Epafrodito, che wachalal, ri are' che wachi'l pa ri nuchak e pa ri nuch'o'j e che ri ix, xitaq uloq wuk' ri in arech ri are' kinulpatanij pa ri nurajawaxik. ²⁶Rumal rech che ri are' kixraj nimalaj iwonojel e sib'alaj kixub'isaj apanoq, rumal rech che ri ix iweta'm chik che ri are' yawab' k'olik. ²⁷Qastzij nak'ut che ri are' xyab'inik, e naqaj xk'o'ji' ukoq chech ri kamikal; k'atek'ut, ri Dyos xutoq'ob'isaj uwach e man xuwi ta ri are' xutoqob'isaj uwach xane xoquje' ri in, arech ri in man kink'is ta nuk'u'x pa ri b'isob'al. ²⁸Xa je'nak'uri', ri in aninaq kintaq na ub'ik ri are' iwuk', arech ri ix kixki'kotik aretaq chi' kiwil chi na uwach ri are' e xoquje' arech ri in kinto'taj jub'iq pa ri b'isonik. ²⁹Qas chik'ulaj b'a' ri are' pa ri Ajawxel ruk' nimalaj ki'kotemal e nim che'iwila' wi konojel ri winaq che ejeri' jas ri are'. ³⁰Xane rumal utoq'ob'isaxik uwach ri uchak ri Kristo, ri are' chunaqaj xk'o'ji' ukoq chech ri kamikal, rumal rech, che ri are' keb' xk'o'ji' wi ri uk'aslemal aretaq chi' xinupatanij ri in, rumal rech che man xixkowin ta ri ix xib'an we toq'ob' ri' chwech ri in.

E'achalaxik, chib'ana' ix jeri' jacha' ri in

³¹K'atek'uri', e'achalaxik; chixki'kot b'a' pa ri Ajawxel... Aretaq chi' ri in kinya ub'ixik weri' chiwech man kq'axow ta chwech ri in, xoquje' jun suk'ab'anik chiwech ri ix: ²¡Chichajij iwib' chkiwach ri etz'i taq winaq! ¡Chichajij iwib' chkiwach ri e'itzel taq ajchakib'! ¡Chichajij iwib' chkiwach ri ewinaq che man qas ta tzij pusim uwi' kikowil! ³Rumal rech, che ri uj qastzij pusim uwi ri qakowil, ri uj che kqaya ri qas toq'ob' je' jas ri ruxlab'al ri Dyos, e che k'o qaq'ijil pa ri Kristo Jesus e che man ku'l ta qak'u'x chrij ri qab'aqil.

⁴Pune'tane', ri in kinkowinik kinjikib'a' ri nuk'ux chrij ri nub'aqil; iwe k'o jun chik kuchomaj che kkowinik kujikib'a' uk'u'x chrij ri ub'aqil, ri in sib'alaj nim kinkowin chi na chuwach ri are'. ⁵Ri in pusim uwi ri nukowil chi pa ri uwajxaq nuq'ij; in rija'l ri Isra'el, in rech ri ujuq'at ri B'enjamin, in ajheb're'o e in uk'ojol jun ajheb're'o; in farise'o chuwach ri Pixab', ⁶xinachixnik chkech ri e'ajkristo e xe'inwoqataj; pa ri usuk'il ri Pixab', ri in, in utzalaj winaq. ⁷K'atek'ut ronojel ri utz taq jastaq wech ri in, ri in kinwilo che chuwach ri Kristo, weri' man utz taj. ⁸K'atek'uri' kamik ri', ri in, ronojel itzel kinwilo chuwach ri nimalaj taq jastaq che xinweta'maj chrij ri Jesus Kristo ri Wajawaxel. Rumal ri are' ri in kink'amowaj che ri in ronojel xintzaqo e ronojel xa jun mes chnuwach ri in, arech ri in kinch'ak ri Kristo. ⁹E arech ri in kinriqitaj pa ri are' man ruk' ta ri nusuk'il ri in, che jun suk'il che petinaq pa ri Pixab', xane pa ri suk'il che kpe pa ri kojoniq chrech ri Kristo, pa ri suk'il che kpe ruk' ri Dyos e che toq'em rumal ri kojoniq, ¹⁰arech ri in kinweta'maj uwach ri are' ruk' ri uchuq'ab' ri uk'astajib'al uwach e ruk' ri riqoj ib' ruk' taq ri uk'axk'ol ri are', arech ri in, in jeri' pa ri ukamikal jacha' ri are', ¹¹arech ri in kya'taj chwech kk'astaj nuwach chkixo'l ri ekaminaqib'. ¹²Ri in, maja' kinopan pa ri uk'isb'alil e maja' kinriqa' che in tz'aqatalaj winaq; xane ri in kintij anim arech ri in kinriqa', je' jas uriqik xub'an ri Kristo Jesus. ¹³E'achalaxik, ri in man kinchomaj taj che xriqitajik wumal in, xane xuwi kinb'ij weri': Ri in man kinchomaj ta chik ri b'e che xb'antaj wumal ri xkanaj kanoq chwij, xane are kinchomaj e kinkoj nuchuq'ab' chech ri k'o chnuwach. Ri in kinb'e ruk' ronojel wuxlab'al, ¹⁴e ri in kintij anim arech kinopan pa ri uk'isb'alil, arech k'o ri tojb'al uk'axel chwech ri kujusik'ij wi ri Dyos chikaj pa ri Kristo Jesus, arech ri uj kqak'amo. ¹⁵Ri uj, che ri uj utzalaj taq winaq, rajawaxik che jeri' kujchomanik; k'atek'uri', we k'o nik'aj jastaq chik kichomaj ri ix, are ri Dyos ri' kya'ow na ri usaqil chiwech. ¹⁶K'atek'uri', kamik ri' pa ronojel ri ujopaninaq wi, jo' b'a' pa we b'e ri'.

¹⁷E'achalaxik, chib'ana' ix jeri' jacha' ri in, qas utz kilik chib'ana' ri e'are', ri k'o jun kik'aslemal che jeri' jacha' ri jun k'amb'al no'j kik'amom quk' ri uj. ¹⁸Rumal rech, che ek'o sib'alaj winaq eje' jas e'uk'ulel ri uripib'al ri Kristo, jacha' sib'alaj nub'im chik chiwech e kinb'ij chi jumal chiwech kamik ri' ruk' uwa'l taq nuwach. ¹⁹Pa ri uk'isb'al kech ri e'are' kkiriq na ri sachib'al ib'; ri e'are' are kidyos ri kipam e are nim kkil wi ri kikowil ri achijab'; xuwi utz chkiwach ri jastaq uwach che rech we uwachulew ri'. ²⁰K'atek'uri' ri uj, ujuwinaqil ri kaj, e sib'alaj qeye'm ri qakolonem pa ri Ajawxel Jesus Kristo che k'o chila' chikaj; ²¹ri Are' che kuya na ri' ri uq'ijil we jun mesalaj qab'aqil ri' jacha' ri uq'ijil ri ub'aqil ri are'; kkowin ri' che uya'ik ruk' ri uchuq'ab' ri are' k'olik, che kkowinik kuya chuxe' raqan ronojel jas uwach.

⁴¹K'atek'uri', ixloq'alaj taq achalaxik, ri ix ix nuki'kotemal, ri ix ix utojb'alil nuchak; chk'oji' b'a' ichuq'ab' pa ri Ajawxel, ixloq'alaj taq achalaxik.

Chixki'kot b'a' ronojel taq q'ij pa ri Ajawxel

²Sib'alaj kinta' chrech ri Evodi'a e xoquje' chrech ri Sintike, qas utz b'a' uk'aslemaxik chkib'ana' chkib'il kib' pa ri Ajawxel. ³Xoquje', kinta chawechech ri at at Sisigo, che qas at jun wachi'l, kinta' chawechech arech qas che'apataniq b'a' ri ixoqib' ri', rumal rech che ri e'are' ek'o wuk' aretaq chi' xinkoj nuchuq'ab' che utoq'ob'isaxik uwach ri utzalaj tzij; jacha' xkib'an ri Klemente e ri enik'aj chik che xechakun wuk', che ri kib'i' tz'ib'atalik pa ri uwujil ri k'aslemal.

⁴Chixki'kot b'a' ronojel taq q'ij pa ri Ajawxel, kinkamulij ub'ixik weri' chiwech: chixki'kot b'a'. ⁵Chketa'maj b'a' chi nimalaj konojel winaq ri ch'uch'ujalaj inojib'al. Naqaj

chik k'o wi ri Ajawxel. ⁶Mamayow ik'u'x ruk' ronojel jastaq uwach e aretaq chi' k'o jun irajawaxik, chixch'aw b'a' ruk' ri Dyos, chita' b'a' chrech ri kiwaj e chixmaltyoxin chrech. ⁷K'atek'uri', ri nimalaj rutzil ri Dyos che are nim chuwach ronojel no'jib'al, are are' ri' ri kchajin na ri iwanima' e ri ichomanik pa ri Kristo Jesus.

⁸K'atek'uri', e'achalaxik ronojel ri k'olik che qastzij, che qas nimalaj, che qas suk'il, che qas ch'ajch'oj, che qas kme'l anima' e che ronojel ri utzil e ronojel nim uq'ijil, ronojel wa' weri' qas chik'ama' b'a'. ⁹Ronojel ri jastaq uwach che xiweta'maj, ri xik'amo, ri xito e ri xiwilo xas pa ri in, qas chib'ana' b'a'. Xa jek'uri' ri Dyos che rech ri nimalaj utzil qas kk'o'ji' ri iwuk' ri ix.

Ri ix, utz ri xib'ano

che xiwuk'aj ri k'axk'ol xinriqo

¹⁰Sib'alaj xinki'kotik pa ri Ajawxel rumal rech che xinna'taj chiwech, qas xinichomaj, k'atek'ut xuwi man ixkowininaq ta che uk'utik chnuwach. ¹¹Man kinb'ij ta weri', rumal rech che ri in xa in meb'a', ri in xinweta'maj kink'asi'k pa ronojel ri kinriqitaj na wi. ¹²Ri in weta'm kink'aslemanik ruk' xuwi jub'iq' e ruk' k'i jastaq. Pa ronojel q'ij e pa ronojel k'olib'al, ri in xinweta'maj kinwa'ik e xinweta'maj kinriq wi'jal, xinweta'maj kink'asi' ruk' taq ri numeb'il e pa ri nuch'analik. ¹³Ri in ronojel kinkowin chech pa Ri Jun, che are kya'ow ri nuchuq'ab'. ¹⁴K'atek'ut, ri ix utz ri xib'ano che xiwuk'aj ri k'axk'ol xinriqo. ¹⁵Ri ix iweta'm, ix ajfilipo: Aretaq chi' xmajtaj ub'ixik ri utzalaj tzij, aretaq chi' xinya kan ri Masedoni'a, man k'o ta jun komon tyox che xuya nik'aj pwaq chwech, xaq xuwi ri ix, ¹⁶ri ix, aretaq chi', ri in in k'o pa ri Tesalonika, kamul xitaq ub'i chwech ri jastaq che rajawaxik chwech. ¹⁷Ri in, man xa ta kintzujuk we taq sipanik ri'; xane are kintzujuk ri utzil che kunimarisaj ri iwutzilal ri ix. ¹⁸Kamik ri', ri in k'o ronojel jastaq uwach wuk' che ri rajawaxik chwech, e kto'taj na; xas kk'u'xnik ri k'o wuk' chi aretaq chi' ri Epafrodita xuya chwech ri toq'ob'isab'al iwach xitaq uloq chwech che utzalaj uxlab'al, jelikalij tab'al toq'ob' che kuk'am ri Dyos e che sib'alaj utz chuwach. ¹⁹E ri Dyos, kuya na ri' chiwech, ronojel ri jastaq uwach che rajawaxik na chiwech, ruk' nimalaj ujachanik e ruk' nimalaj uq'inomal pa ri Kristo Jesus. ²⁰Ri q'ijil chrech ri Dyos, Qatatxel, chub'eq'ij chub'esaq! Amen.

Ri rutzil wachaj e ri uk'isb'al kanoq

²¹Chiya'a' jun rutzil kiwach ri etyoxlaj taq winaq pa ri Kristo Jesus. Ri e'achalaxik che ek'o wuk' ri in kkiya' apanoq jun rutzil iwach ri ix. ²²Konojel ri etyoxlaj taq winaq, kkiya' apanoq jun rutzil iwach, are sib'alaj enab'e kkitaq apan jun rutzil iwach ri ejun ja winaq ek'o pa ri rachoch ri Sesar.

²³Ri usipanik ri Ajawxel Jesus Kristo kuxta b'a' pa ri iwuxlab'al ri ix.